

ԼԵՌՆԱՅԻՆ ՂԱՐԱՐԱՂԻ ԻՆՔՆԱՎԱՐ ՄԱՐԶ (ՊԱՏՄԱ-ԱՇԽԱՐՀԱԳՐ. ՀԱՄԱՌՈՏ ԱԿՆԱՐԿ)

● Արտատպելով «Երեկոյեան Երեւան» օրաթերքի 26 Մայիս 1988ի համարէն, ստուրբ կուտանք պատմաշխարհագրական հակիրճ տեղեկութիւններ Լեռնային Ղարաբաղի մասին, հարստացնելու համար մեր ընթերցողներուն գիտելիքները մայր հայրենիքի այս կարեւորագոյն շրջանին վերադրեալ, զոր համայն հայութիւնը կը պահանջէ վերակցել մայր հանրապետութեան՝ Խ. Հայաստանին :

Լեռնային Ղարաբաղի Ինքնավար Մարզի տարածքն զբաղեցնում է պատմական Հայաստանի ամենաընդարձակ նահանգներից մէկի՝ Արցախի լեռնային հատուածի մի մասը :

Արցախը մ. թ. ա. 2րդ դարից մինչեւ մ. թ. 5րդ դարը եղել է Արշակունիների ու Արտաշէսեանների հայկական թաղաւորութեան բաղկացուցիչ մասը : 5-7րդ դարերում այն մոռցուած է եղել Սասանեան Պարսկաստանի կազմած Այդուանք մարզպանութեան մէջ, իսկ 7-9րդ դարերում դառնում էր Արարական խալիֆայութեան ժամանակաշրջանում կազմաւորուած Արմենիա փոխ-արքայութեան կազմում : Սկսած 10րդ դարից, երբ Հայաստանը շատ թէ քիչ անկախութիւն է ձեռք բերում (Բագրատունիների ժամանակ), Արցախում կազմաւորում են մի քանի հայկական իշխանութիւններ, որոնք համարեա թէ անկախ տիրապետութիւններ էին :

Անհրաժեշտութեան դէպքում դրանք միաւորուած եւ ընդհանուր ուժերով պայքարում էին արեւելեան տափաստանային վայրերից ու հարաւից յաճախակի յարձակուող թաթար-մոնղոլների, թուրք-սելճուկների ու արարների դէմ : Արցախի հայկական այդ իշխանութիւնները միասին մի հզօր վահան էին դարձնում արտաքին թշնամիների դէմ՝ ի պաշտպանութիւն կենտրոնական Հայաստանի :

16-17րդ դարերում Արցախի այդ իշխանութիւններից՝ մելիքութիւններից հինգը հանրայայտ էին եւ միասին կոչւում էին Խամսայի մելիքութիւններ : Դրանք Խաչէնի, Վարանդայի, Դիզակի, Զրաբերդի եւ Գիւլիստանի մելիքութիւններն էին : Ներկայիս Լեռնային Ղարաբաղի Ինքնավար Մարզի տարածքը մօտաւորապէս համընկնում է այդ հինգ մելիքութիւնների տարածքին :

Մարզի տարածութիւնը կազմում է 4.4 հազար քառ. քմ. : Այն բաժանուած է հինգ վարչական շրջանների՝ Ասկերանի, Հադրութի, Մարտակերտի, Մարտունու, Ծուշիի :

Տարածքի տեսակէտից ամէնից ընդարձակը Մարտակերտի շրջանն է (1700 քառ. քմ.) : Յաջորդ տեղերը համապատասխանաբար զբաղեցնում են Ասկերանի (900 քառ. քմ.), Մարտունու (800 քառ. քմ.), Հադրութի (700 քառ. քմ.), Ծուշիի (300 քառ. քմ.) շրջանները :

1988 թ. Յունուարի 1ի դրութեամբ Լեռնային Ղարաբաղում կայ 215 բնակավայր, որից 200ը ամբողջապէս հայաբնակ են : Մարզում կայ չորս քաղաք եւ չորս քաղաքատիպ աւան : Համեմատաբար խոշոր քաղաքը մարզային վարչական կենտրոն Ստեփանակերտն է, որի բնակչութիւնը կազմում է 50 հազար մարդ : Միւս մեծ քաղաքը Ծուշին է : Այն արցախ-Ղարաբաղ աշխարհի հին քաղաքն է, 1752 թուականից բերդ-ամրոց էր, իսկ 1840 թուականից կոչուել է քաղաք :

Բարձրադիր, գեղատեսիլ սարահարթի վրայ փռուած Ծուշին մինչեւ 20րդ դարի սկիզբը եղել է Անդրկովկասի մարդաշատ, մշակութային, առեւտրական խոշոր կենտրոններից մէկը : Բարձրութիւնը ծովի մակերեւոյթից աւելի քան 1300 մետր է : Սարահարթը, որի վրայ տեղադրուած է Ծուշին, երեք կողմից շրջափակուած է խիստ զառիթափ, անդնդախոր, բայց անզուգական գեղեցկութիւն ունեցող կիրճով, որտեղով հոսում է կարկառ գետը : Մեղմ կլիմայի, լեռնային մաքուր օդի, գեղատեսիլ դիրքի ու հանքային ջրի շնորհիւ Ծուշին առողջարանային, հանգստեան եւ տուրիստական կարեւոր քաղաք է դարձել :

Քաղաքը արագ զարգացել է յատկապէս 1805 թուականից յետոյ, երբ Ղարաբաղը միացուել է Ռուսաստանին : Այդ ժամանակից արագօրէն զարգանում են մշակութային եւ առեւտրական կապերը Ռուսաստանի եւ եւրոպական երկրների հետ : 1820ական թուականներից այստեղ բացւում են տպարան, հայկական դրսրոցներ, հրատարակւում գրքերը թերթեր, կազմակերպւում են թատրոններ, ակումբներ : Ռաֆֆու, Պ. Պոստանի Ղ. Աղայեանի, Լէոյի եւ հայ այլ խոշոր գրողների որոշ գրքեր առաջին անգամ տպագրուել են Ծուշիում : Առհասարակ նախասովետական շրջանում Ծուշին հայ մշակութային կեանքի ծաղկման դարձում Անդրկովկասում եզակի դեր է խաղացել : Իպրոցական եւ տպարակական գործի, արուեստի, արհեստագործութեան, առեւտրի զարգացումը կարեւոր դեր է խաղացել Ծուշի քաղաքի լայն ճանաչման գործում : Այն սերտ կապերի մէջ է եղել ժամանակի խոշոր քաղաքների հետ : Պատահական չէ, որ այս քաղաքը, տուել է գիտութեան, մշակոյթի, արուեստի բոլոր ընդհանուրների խոշոր գործիչներ : Ծուշիում են ծնուել կուսակցական, պետական, տնտեսական ականաւոր գործիչներ, պատմաբաններ՝ գրողներ, այդ թւում՝ Իվան Թելոսեանը, Մարգիտ Կասեանը, Սահակ Տէր Գաբրիէլեանը, Աշոտ Յովհաննիսեանը, Ալեքսանդր Բեկզադեանը, Հայկ Գուլիքեւիսեանը, Մուրացանը, Լէոն եւ շատ այլ հայ գործիչներ : Այստեղ է ծնուել Սովետական Միութեան կըրկնակի հերոս Նելսոն Ստեփանեանը :

Ճարտարապետական տեսակէտից Ծուշին մեծ հետաքրքրութիւն ներկայացնող եւ հիմնականում հայաբնակ քաղաք է եղել մինչեւ 1920 թ. ողբերգութիւնը : Քաղաքի հայաբնակ թաղամասերը զբաղեցնում էին նրա բարձրադիր մասը եւ կոչւում էին Ղազանչեցոց, Աղուլեցոց, Մեղրեցոց ու այլ թաղամասեր : Հայկական թաղամասերը կառուցապատուած էին ճարտարապետական տեսակէտից հետաքրքիր բնակելի ու հասարակական շէնքերով, ունեցել են իրենց կենտրոնները, դպրոցները, ակումբը, գրադարանները, խանութները, հիւրանոցներն ու եկեղեցիները : Մեծ հետաքրքրութիւն էին ներկայացնում Ղազանչեցոց Ամենափրկիչ տաճարը, Կանաչ ժամը, Աղուլեցոց Ս. Աստուածածին, Մեղրեցոց Ս. Աստուածածին եկեղեցիները, Խանդամիրեան թատրոնի, սէլակիական դպրոցի ու շատ այլ քարակերտ շէնքերը :

Ս. ՄԵԼԻՔՈՒՄԵԱՆ

Աշխարհագրական գիտութիւնների դոկտոր, փրոֆեսոր (վերջը յաջորդով)